



Broj: 03-45-263-1/2021
Bihać, 21.01.2021. godine

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Priljeno: 22-01-2021			
Org. jed.	Broj	Priloga	Vrijednost
01/c 01	02/c -02	-251	/21

- Predsjedništvo Bosne i Hercegovine
- Predstavnički dom Parlamentarne skupštine BiH
- Dom naroda Parlamentarne skupštine BiH
- Svi Klubovi poslanika Parlamentarne skupštine BiH
- Vijeće ministara Bosne i Hercegovine
- Ministarstvo sigurnosti Bosne i Hercegovine
- Ministarstvo civilnih poslova Bosne i Hercegovine
- Ministarstvo za ljudska prava i izbjeglice Bosne i Hercegovine
- Predstavnički dom Parlamenta F BiH
- Dom naroda Parlamenta F BiH
- Svi Klubovi poslanika Parlamenta F BiH
- Vlada Federacije Bosne i Hercegovine
- Skupština Republike Srpske
- Vlada Republike Srpske
- Skupština Brčko distrikta Bosne i Hercegovine
- Vlada Brčko distrikta Bosne i Hercegovine
- Vlade Kantona
- Savez općina i gradova F BiH

Predmet: Položaj Bosne i Hercegovine u odnosu na prijedlog Pakta o azilu i migracijama
Evropske komisije, dostavlja se

Poštovani,

u ime Vlade Unsko-sanskog kantona obraćamo Vam se s pozivom da zajedničkim snagama, svako u okviru svojih nadležnosti, poduzmemo konkretne korake u uspostavljanju jake državne koordinacije u upravljanju migrantskom krizom na teritoriji Bosne i Hercegovine. Apelujemo na nadležne institucije da proaktivno poduzimaju korake zaštite pozicije BiH u dugoročnom kontekstu dešavanja u institucijama Evropske unije, konkretno polazeći od politike migracija. Ukazujemo na nužnost dugoročnog, analitičkog razmišljanja i pristupa problematici migracija u BiH, kao zemlji na granici Evropske unije, posebno u okviru definisanja novog Pakta o azilu i migracijama Evropske komisije koji u fokus stavlja vraćanje ilegalnih migranata i njihovo zadržavanje na vanjskim granicama EU, te da ne dozvole pokušaje prebacivanja odgovornosti za azil i zloupotrebe razvojne pomoći i drugih alata za vršenje pritiska na BiH kao prvu zemlju nečlanicu na vanjskoj granici EU.

S obzirom da Unsko-sanski kanton u posljednje tri godine podnosi najveći teret migrantske krize u Bosni i Hercegovini kroz koji je u proteklom periodu prošlo više od 100 000 ilegalnih migranata, od čega 70 000 registrovanih kod Službe za strance, sa žaljenjem, a na osnovu dosadašnjeg iskustva i trenutnog stanja na području Unsko-sanskog kantona, moramo konstatirati da zbog nedostatka adekvatne koordinacije aktivnosti između međunarodnih

partnera, nadležnih državnih institucija za pitanja migracija i lokalnih vlasti koje u operativnom smislu nose najveći teret migrantske krize, rezultati na terenu su izostali te se rješenje isključivo tražilo od Unsko-sanskog kantona.

U cilju zaštite kako građana Unsko-sanskog kantona tako i ilegalnih migranata koji borave na području Bosne i Hercegovine a u cilju uspostavljanja jake državne koordinacije i upravljanja procesom migracija na teritoriji cijele države, potrebno je ravnomjerno rasporediti kampove za prihvata migranata na teritoriji BiH kako bi se smanjio pritisak na zapadni dio BiH, odnosno Unsko-sanski kanton, a sve u cilju dugoročnog pristupa problematici migracija u BiH, kao zemlji na granici Evropske unije. Posebno naglašavamo potrebu definisanja stava države Bosne i Hercegovine po pitanju prijedloga novog Pakta o azilu i migracijama Evropske komisije koji u fokus stavlja vraćanje ilegalnih migranata i njihovo zadržavanje na vanjskim granicama EU, stoga je neophodno odmah pristupiti izradi strateškog dokumenta koji bi bio rezultat zajedničkog, koordiniranog rada svih nivoa vlasti gdje bi se definirali temeljni principi, svi relevantni pokazatelji sa terena (analize, zatečeno stanje) i neophodne aktivnosti nadležnih institucija za određeno vremensko razdoblje, a sve u cilju upravljanja migracijama u Bosni i Hercegovini. Potrebno je određivanje kvota za prihvata ilegalnih migranata u BiH i raspoloživih smještajnih kapaciteta kojima će upravljati nadležne državne institucije.

Sudeći po insistiranju na vraćanju i zadržavanju ilegalnih migranata na vanjskim granicama EU jedna od zemalja mogla bi postati hotspot te cijenimo hitno potrebnim reagovati kako to ne bi bila sudbina Bosne i Hercegovine na koju bi, uz opterećenje za humani prihvata tranzita lako mogao biti prebačen i teret trijaže, detencije i vraćanja migranata koji budu odbijeni u zahtjevima za azil u državama članicama EU. Ovim, pored problematike readmisije, preciznije nasilnog vraćanja hiljada ilegalnih migranata s područja R Hrvatske u Bosnu i Hercegovinu, mimo Sporazuma o readmisiji, dugoročno se otvara i nova prijetnja po sigurnost BiH i situacija zahtijeva da država BiH govori jednim glasom. Napominjemo da nam je finansijska pomoć EU potrebna da bi se nosili sa stanjem uzrokovanim globalnim problemom migracija, ali da finansijska pomoć neće riješiti problem, ukoliko uvjetuje otvaranje beskonačnog broja novih kampova za migrante. Nimalo ne ohrabruje ni najava „fleksibilnosti“ za države EU po kojoj se mogu izjasniti da li će prihvatiti tražitelje azila ili će sponzorski pomagati graničnim državama, do koje su došli ilegalni migranti, da ih vrati u zemlje porijekla.

U cilju efikasnije kontrole istočne granice Bosne i Hercegovine pozivamo nadležne institucije da hitno pristupe opremanju Granične policije BiH sofisticiranom opremom potrebnom za njihov rad na terenu i kadrovsko jačanje ove policijske agencije kao i angažovanje drugih policijskih agencija kao ispomoć na istočnoj granici Bosne i Hercegovine.

Za upravljanje migracijama i postupanje nadležnih policijskih i drugih agencija potrebno je da se pristupi izmjenama i dopunama Zakona o azilu i Zakona o strancima Bosne i Hercegovine. Smatramo da navedeni zakoni ne tretiraju adekvatno trenutno prisustvo ilegalnih migranata u Bosni i Hercegovini. Usvajanjem izmjena i dopuna ova dva zakona regulisala bi se pitanja migracionih tokova u BiH, između ostalog, postupak ulaska stranaca u BiH i njihov boravak, a sve da bi se spriječila bilo kakva diskriminacija i neravnopravnost te osiguralo uživanje najvišeg stepena ljudskih prava u skladu s međunarodnim standardima i pravnom stečevinom Evropske unije. Navedenim izmjenama je potrebno pristupiti u pravcu zaštite imovine građana Bosne i Hercegovine ili pristupiti donošenju novog propisa koji bi tretirao status ilegalnih migranata u Bosni i Hercegovini.

Vrijeme je da zajedno odgovorimo na izazove koji su pred Bosnom i Hercegovinom u upravljanju migracijama, poučeni iskustvom iz proteklih godina te u najboljem interesu naše države i građana BiH čija vrijednost nije manja time što nismo formalno članica EU.

Vjerujući da ćete prepoznati ovaj krucijalni problem kojim se trenutno najviše suočavaju građani i vlast Unsko-sanskog kantona, a sve u cilju koordinacije u aktivnostima upravljanja migrantskom krizom koja za nekoliko mjeseci može eskalirati na cijelom području Bosne i Hercegovine, posebno zbog nadolazećeg novog vala migranata na proljeće što je i jedan od dodatnih razloga da se u naredna tri mjeseca trajno riješe ključni problemi tranzita i boravka ilegalnih migranata. Pozivamo Vas na zajedničko institucionalno zakonito djelovanje na rješavanju zajedničkih izazova kao što su krijumčarenje migranata i izgradnja zakonitih načina ulaska i zadržavanja ilegalnih migranata u Bosni i Hercegovini, u odnosu na prijedlog Pakta država članica EU-a po kojem mogu odlučiti prihvatiti (premjestiti) podnositelje zahtjeva za azil ili se obvezati na vraćanje nezakonitih migranata.

S uvažavanjem,

Dostavljeno:

1. Naslovu
2. a/a



PREMIJER KANTONA
mr.sci. Mustafa Ružnić